

# अपरंच

TC/RAJ/RAJ/00095

राजस्थानी भासा अर साहित्य री तिमाही

अक्टूबर-दिसंबर 2015

सलाहकार मंडल

मोहन आलोक, गंगानगर

नंद भारद्वाज, जयपुर

डॉ. आईदान सिंह भाटी, जोधपुर

डॉ. नीरज दइया, बीकानेर

संस्थापक संपादक

स्व. पारस अरोड़ा

संपादक

गौतम अरोड़ा

## विदेशी कविता विसेसांक

संपादन संयोग

शंकरसिंह राजपुरोहित, बीकानेर

डॉ. मदन गोपाल लढ़ा, महाजन

प्रह्लाद राय पारीक, पीलीबंगा

गौरीशंकर कुलचंद्र, हनुमानगढ़

ओम नागर, कोटा

मुखौळ : स्व. पारस अरोड़ा जोधपुर

टाइप सैटिंग : भंडारी ऑफसेट जोधपुर

अंतरजाळ अंक संचालक : डॉ. नीरज दइया बीकानेर

साज सज्जा : रमेश व्यास जोधपुर

सगळा पद अवैतनिक

सदस्यता

अंक अंक रौ मोल : 30 रिपिया

अंक बरस रौ मोल : 100 रिपिया

तीन बरस रौ मोल : 250 रिपिया

आजीवन : 1100 रिपिया

प्रकासक

अपरंच प्रकासण

A-360, सरस्वती नगर, बासनी, जोधपुर 342 005 ( राज. )

दूरभास : 0291-2720796, 7877982810, 9413961800

e-mail : apranchrajasthani@gmail.com

web : www.apranch.wordpress.com

# जात्री सुर

(विदेशी कवितावां रौ राजस्थानी उल्थौ)

---

उल्थाकार

पारस अरोड़ा

## विगत

भासा	कविता	कवि	पृष्ठ
तुर्की	वा बोली	नाज़िम हिक्मत	6
ब्राजीली	प्रार्थना	म्यूरियल मेंद	7
ब्राजीली	प्रार्थना	जान गोल्सवर्दी	8
जर्मन	उण वगत अर इण बगत	होल्डर लिन	9
जर्मन	प्रेम री कविता	रेनेर मेरिया रिलके	10
क्यूबन	मां विदा दै !	प्लेसिडो	12
रूसी	साथी लेखकां सूं	ब्लादिमीर मायकोवस्की	13
रूसी	अँडै ऊंचै क्षणां में	ब्लादिमीर मायकोवस्की	15
जर्मन	बापड़ो बी.बी.	बरतोल्त ब्रैख्त	16
अमरीकन	अर युद्ध नुंवौ व्हे या पुराणौ	कार्ल सैण्डबर्ग	18
क्यूबन	सिपाई री लास	निकोलस गोलियन	19
बीटनीक	हाडका	जैक केरुएक	20
ग्रीक	कवि	रेम्को कैम्फर्ट	21
रूसी	गांव	बोरिस पास्तरनाक	23
स्पेनिश	आत्महत्या	गार्सिया लोर्का	24
युगोस्लाव	रेलगाडी	इवान इवानवी	25
मैक्सिकन	लपट	आक्टेवियो पाज़	26
चिलीयन	बुण रयी हूं अेक सरीर	गैब्रेला मिस्ट्राल	28
चिलीयन	हरेक चीज सारू म्हनै माफ कर दो!	गैब्रेला मिस्ट्राल	29
ब्राजीली	ओळख	सेसीलिया मिरले	30
ब्राजीली	दूजौ जीवण	कैसियानो रिकार्डो	31
डेनिस	भुलाव	पॉल बॉरम	32
हिन्देशियाई	थोथप	चयरिल अनवर	33
हिन्देशियाई	विदा	चयरिल अनवर	34
मैक्सिकन	घणा पैली रौ बसंत	लूई कारनूदा	35
कामनवेल्थ ( ब्रि.गा.)	अगनी पुसप ! थूं पाछौ आव	मार्टिन कार्टर	36

कामनवेल्थ (वेल्स)	धोळी सिलावां री घाटी	पॉल इवान्स	38
कामनवेल्थ (केन्या)	उपद्रववाळौ क्षेत्र	जे. एच. चेपलीन	40
रूसी	ईसको	येवजेनी येवतुशेंको	41
रूसी	इतिहास	अलेक्सेई सुर्कोव	43
अरबी	अरदास	इब्न-अल-अरबी	45
हंगेरियन	कविता रै अनुकूल घर	मिकलोस रादनोती	47
हंगेरियन	पिक्चर पोस्टकार्ड	मिकलोस रादनोती	50
पेरू (स्पेनिश)	तीन कवितावां	सेजार वेलेजो	53
जर्मन	निजू-भासा	ह्यूगो वान हाफमान्स्थल	57
अमरीकन	समापन रा बोल	अेजरा पाउंड	58
अमरीकन	अेक छोरी	अेजरा पाउंड	59
अमरीकन	जीवणकाळ	विलियम कार्लोस विलि.	60
अमरीकन	बडेरां री पीड	अेलफ्राजिना स्टार्नी	61
बलगेरियन	इतिहास रै नांव	निकोला वाप्सरोव	62

## ● सम्पादक री बात

### सै कीं थिर व्हेगौ

31 अक्टूबर, 2015 नै सवार रा चार बजियां म्हारै सारू सैं कीं थिर व्हेगौ। घर सू फोन आयौ कै पारस जी अबै आपां बिचाळे नीं रैया। उण बगत म्हैं जयपुर री ट्रेन मांय हौ, रात ताई सब सागै हा अर पारस जी स्वस्थ, हंसता-बोलता हा। जयपुर पूगतां पाण ईज पाछौ जोधपुर सारू व्हीर व्हियौ। पारस जी री इच्छा मुजब वारी देह मेडीकल रा शोधार्थियां सारू मेडीकल कॉलेज जोधपुर नै दान करीजी।

आपरै पिता रौ जाणौ सब नै घणौ दुख देवै, पण म्हारै सारू वै फकत म्हारा पिताजी ईज नीं हा। पारस जी म्हारै सारू म्हारा पिता, गुरु, भाई, मित्र अर अपरंच रै पाण सहकर्मी भी हा। पारस जी 'अपरंच' 1978 रै मांय श्री अर्जुन देव चारण रै सागै मिल 'र निकाळी। पैलै बरस रा च्यार अंकां रौ संपादन दोनू मिल 'र कर्यौ। 1978 सू 1980 ताई अपरंच रा नौ अंक सांमी आया। पछै आर्थिक कारणां सू अपरंच रौ काम आगै नीं बध सक्यौ। 1989 रै मांय अेकर फेरुं सोळा पेज री पत्रिका रै रूप 'अपरंच' काढण री खेचळ करीजी, पण अेक अंक पछै काम आगै नीं बध सक्यौ। पारस जी रै मन मांय आ बात हमेस रैयी कै पत्रिकावां निकळणी चाईजै अर पत्रिकावां राजस्थानी भासा मान्यता आंदोलन रौ महताऊ पख है। सेवट सन् 2012 मांय 'अपरंच' पाछी सरू व्ही, चार अंकां रै संपादन पछै 2013 मांय पारस जी री इच्छा मुजब म्हैं 'अपरंच' रै संपादन मांय वारै सागै जुड़्यौ अर 2013 मांय रंगीन कवर सागै मौजूदा रूप री 'अपरंच' सांमी आई अर तद सू आज ताई अपरंच लगोलग छप रैयी है।

2013 मांय जद सू म्हैं अपरंच रौ काम देखणौ सरू कर्यौ तद सू पारस जी म्हारै सागै अेक गुरु अर सहकर्मी रै भांत व्यवहार राखियौ। म्हारी व्याकरण री कमजोरी जाणता थकां वै जाण 'र पैली म्हारै सू अपरंच रा प्रूफ पढवावता अर पछै खुद उण मांय गलती काढ 'र म्हनै सिखावता।

पारस जी अनुवाद रै पेटै घणौ काम कर्यौ। आ बात न्यारी है कै वारै काम री बगतसर कूंत नीं होय सकी। वारै अनुवाद कर्योड़ी रचनावां 'माणक', 'जागती जोत' अर दूजी राजस्थानी पत्रिकावां मांय लगोलग छपती रैयी। वै स्टिफन ज्विग रै उपन्यास 'विराट' रौ भी राजस्थानी उलथौ कर्यौ जकौ उण बगत 'माणक' मांय छप्यौ। राजेश जोशी री लांबी कविता 'समरगाथा' रौ भी वै राजस्थानी मांय अनुवाद कर्यौ जिकौ पैलां 'अपरंच' मांय अर पछै किताब रूप छप्यौ। मंगलेश डबराल रै गद्य काव्य संग्रह 'हम जो देखते हैं' रौ राजस्थानी उलथौ 'म्हां जिकौ देखां' 2013 मांय साहित्य अकादेमी, नई दिल्ली सू छप्यौ। पारस जी री केई विदेसी भासावां रै कवियां री कवितावां रौ राजस्थानी मांय उलथौ कर्यौ, जिकौ केई पत्र-पत्रिकावां मांय छपतौ रैयी। अपरंच रै इण अंक मांय म्हैं वारै इण महताऊ काम नै अंवेरण री कोसीस करी है।

लारला दिनां 'अपरंच' रा अंक बगतसर नीं निकळ्या है, इण सारू माफी चावूं, म्हारै सारू सै कीं थिर है, कोसिस है कै अेकर फेरुं सैं कीं चेतन व्हे।

—गौतम अरोड़ा



जलम : 15 जनवरी 1902

निधन : 3 जून 1963

## ●तुर्की

नाज़िम हिक्मत

---

### वा बोली

अठी आवौ  
वा बोली अर  
रुकौ वा बोली  
अर मुळकौ  
वा बोली अर  
मरो वा बोली  
म्हें आयौ, म्हें रुकियौ  
म्हें मुळक्यौ  
म्हें मरगौ।

ॐॐ

(पहल / पोस्टर)

अपरंच (अक्टूबर-दिसम्बर 2015) ● 6

## ● ब्राजीली



जलम : 13 मई 1901

निधन : 13 अगस्त 1995

म्यूरियल मेंद

---

## प्रार्थना

थूं महान है  
थारी महिमा अपरंपार है  
इण सारू नीं के थारी माया सूं  
दिन में सूरज चमकै—  
अर रात में सितारा  
इण सारू नीं के थूं संसार बनायौ  
उणरौ वैभव बनायौ—  
खेतियां-पुसप-सिनेमा-रेलां  
इण सारू नीं के थूं समंदर बनायौ  
उणरौ वैभव बनायौ—  
माछळ्यां, बूटा, पनडुब्बियां  
अर जळपरियां ।  
म्हैं थनै इण सारू महान् मानूं हूं  
के थूं खुद नै छोटो बनाय लेवै है  
इतरो छोटो के, हूं कमजोर अर भाग्यहीण  
म्हारै मांय थनै मौजूद पाऊं हूं ।

ॐ ॐ

(नवनीत, नवंबर, 1960)

अपरंच (अक्टूबर-दिसम्बर 2015) ● 7



जलम : 14 अगस्त 1867  
निधन : 31 जनवरी 1995

## ● ब्राजीली

जान गोल्सवर्दी

---

### प्रार्थना

किणी बसंती रात में  
म्हें निकळूं घूमण सारू  
अर म्हनै मिळ जावै  
भगवान  
किणी रूख हेठै  
किसी प्रार्थना उण वगत  
म्हारै मूंडै सूं निकळै ?

म्हारी प्रार्थना आ व्है  
के  
सुविचारित हिम्मत रा स्वामी !  
बसंती रात रा हे स्रस्टा !  
कर दो म्हारो हिवडौ  
इतरो मजबूत  
के  
नीं मांगूं म्हें थांसूं  
कदै कोई चीज ।  
ॐॐ

( नवनीत, नवंबर, 1968 )



●जर्मन



जलम : 20 मार्च 1770  
निधन : 7 जून, 1843

होल्डर लिन

---

उण वगत अर इण वगत

टाबरपणै में  
हर सवार म्हनै खुसी सूं भर जावती  
पण हर सांझ म्हारी आंख्यां सारू नमी लावती ।  
अर अबै उमर वधियां पछै—  
हरेक दिन वैम सूं सरू होवै है  
पण उणरौ अंत—  
कितरौ निर्मळ—कितरौ पवित्र !

ॐॐ

(कविताएँ 2/4)

अपरंच (अक्टूबर-दिसम्बर 2015) ● 9



जलम : 4 दिसंबर 1847  
निधन : 19 दिसंबर 1926

## ●जर्मन

रेनेर मेरिया रिलके

---

### प्रेम री कविता

म्हारा दोन्यूं नैणां री जोत बुझाय दे  
तौ ई थूं म्हारी निजर में रैवैला ।

इतरो हाकौ व्हे के कीं नीं सुणीजे—  
तौ ई जद थूं बुलावैला  
तौ म्हनै आपरै कनै पावैला ।

पंगु व्हेतां सांतर ई  
थारी ऊंचाइयां ताई पूग जावूंला  
बिना मूंडै रै ई  
थारा गुण-गीत गाऊंला ।

म्हारी दोनूं भुजावां तोड़ दै  
तौ ई म्हारै हिड्डै सूं— हाथां री तरै  
थनै फेर बांध लेवूंला ।

म्हारै हिड्डै री धड़कण नै जकड़ दै ।

म्हारै मगज री धमनियां मांय  
वा इज धड़कण पैदा हुय जावैला  
अर जे थूं म्हारै मगज में ई अगन फूंक देवैला  
तौ म्हैं थनै म्हारी नाडियां रै रगत में रमाय लेवूंला ।

ॐॐ





जलम : 21 जनवरी 1947

## ●क्यूबन

प्लेसिडो

---

### मां विदा दै

काई हुयो मां, जे दुरदिन में हुय रैयौ है, भाग म्हारौ अस्त!  
समाप्त इतिहास म्हारै जीवण री पीड़ रौ,  
जीवण-चक्र रौ काळ इत्तौ छोटौ!  
मां, थारै अंतर में उटैला पीड़ री हूक!  
रो मत मां! म्हारै वास्तै दुखी व्है मती!  
सांती सूं मिरतु रौ करूं हूं वरण,  
वरण गौरवपूरण काळ रौ!

इणसूं पैली के म्हारी जीवण-वीणा हुय जावै सांत  
थारै सारू उण माथे अेक स्वर छेड़ दूं।  
मिरतु गीत रौ स्वर,  
अेक अैड़ौ स्वर जिकौ कर देवैला पीड़ री आह नै मंदी,  
ठीक विसी इज पवित्र, निस्कळंक,  
विस्वासू अर भावमयी पीड़ा  
जेड़ी के थनै म्हारै जलम री बगत हुई ही मां!  
अर अबै पाछौ औ बगत है!  
हे प्रभु! बगस दै म्हारा पाप, अभय दै!  
मां विदा दै!  
यात्रा रौ बगत हुयगौ है।

ॐॐ

(कविताएँ 1/5)

● रूसी

ब्लादिमीर मायकोवस्की

---



जलम : 19 जुलाई 1893  
निधन : 14 अप्रैल 1930

साथी लेखकां सूं

लागै है के  
'ब्रिस्टल' में बैठगै री  
'बार' रै किनारै ऊभा रैवण री  
आदत म्हनै नीं पड़ सकै।  
म्हें प्यालियां नै उलट देवूला  
मेज माथे मुक्कौ मार कैवूला :  
    “सुणौ साहित्तिक साथियां!  
    बैठा थे  
    चाय में आंख्यां गडायां,  
    कलम घिसतां-घिसतां  
    थारी मखमली खूणियां घिसगी।  
    प्यारां  
    सबदां हाथ पकड़्या थे क्युंकर,  
    जिकौ चिप्योड़ा इज रैवौ हो  
    भींतां  
    अर भींतां रा कागदां सूं?  
    थानै पतौ है कांई  
'फ्रांक्वाय बिला' लिख 'र  
म्हें लागगौ हो लूट रै काम में?  
अर थे, जिका के पेंसिल रा  
चक्कू नै देख 'र धूज जावो हो,  
मध्य-युग रा संरक्षक कैवीजण रा  
दावेदार हो;  
आज रै बारै में लिखण सारू

थारै कनै है काई, बोलौ ?  
किणी सोलीसिटर रै सहायक नै  
जिंदगाणी में  
सौगुणा वत्तौ मजौ आवै है ।

सभ्य कविगण !

हाल ताईथारौ मन नीं भरीजियौ  
दूतां सूं, मै 'लां सूं, प्रेम सूं  
थारै जैड़ा लोग इज जे  
हुया करै है कवि तौ पछे म्हेँ  
थूकूं हूं सगळी कळा माथै !  
उणरी जगै म्हेँ खोलूला दुकान,  
लागूला सट्टैबाजी में,  
अर खुद कनै मोटा-तगड़ा नौकर  
जोड़ूला ।

किणी सराय रै लारली कानीं  
आपरी आत्मा री उल्टी करूला  
दारूड़ी राग में !  
काई इण मुक्कै रौ असर होवैला ?  
काई औ थारा बाळां री नोकां रै मांय  
घुस सकैला ?

पण थारा बाळां रै जंगळ नीचै  
कोरो अेक इज विचार है :  
बाळां नै संवारणा ! पण अै किण सारू ?  
थोड़ै इज समै सारू,  
तद फळ री तुलना में मैणत वत्ती है  
अर अणंत काळ ताई  
बाळां में संवार रैवै,  
औ संभव नीं है !''

ॐॐ

(सुप्रभात, सितंबर, 1957)

## अँडै ऊंचै क्षणां में

अेक रौ टंकोरौ बाजगौ  
रात अवाजहीण है  
अर, अँ क्षण थूं नींद नै भेंट कर चुकी व्हेला ।  
आकास गंगा चांदणी में धुप र  
और्यूं धोळी व्हेयगी व्हेला ।

आं सगळ्या पळकता संकेतां रै प्रति  
म्हें अणुत्तरित हूं, स्फूर्तिहीण !  
सोचूं हूं— म्हें थनै क्यूं जगाऊं, कीकर दूं कोई तकलीफ ?  
अर लोग तो कैवै इज है के  
अध्याय समाप्त हुयगो है  
नित रा निर्मम थपिड़ा सूं  
निकामी हुयगी है प्रीत री नाव,  
म्हां अबै रैयगा हां— सबदहीण ।  
पछै क्यूं हुवां आपसरी रै संवेदित  
क्यूं नीं मान लेवां होणी री देण  
(जिको ई कीं देवै ।)  
तारा भर दियो अंबर नै रात री भुजावां में,  
अेक रौ टंकोरौ बाजगौ  
रात सबदहीण है ।  
अँडा ऊंचा क्षणां में इज तौ  
कोई उठ सकै इत्तौ के  
बतळाय सकै—  
काळ नै, इतिहास नै  
अर सकळ स्रस्टी नै ।

ॐॐ



जलम : 10 फरवरी 1898  
निधन : 14 अगस्त 1956

## ●जर्मन

### बरतोल्त ब्रैख्त

---

#### बापड़ो बी.बी.

मैं, बरतोल्त ब्रैख्त, काळा जंगळां रौ निवासी हूं।  
मां म्हनै पेट में लियां इज नगर में आयगी ही।  
अर जठा ताई मैं झड़ नीं जाऊं,  
जंगळां री ठंड म्हारै सूं अलग नीं व्हेला।

कोलतार रै नगर में मैं प्रसन्न इज हूं,  
मैं सरू सूं इज मौत रा सगळा प्रतीकां समेत हूं :  
समाचार पत्रां सूं, दारू सूं, अर तम्बाकू सूं  
संदेही अर आळसी अर आखिरकार संतोसी।

लोग म्हनै परसण करै है। मैं वारी  
रीत रै मुजब 'बाउलर टोप' लगाऊं हूं।  
मैं कैवू के बडा नुक्ताचीण लोग है अँ!  
पण कोई बात नीं, मैं खुद अँडौ इज हूं।

सवार री बगत कदै-कदै मैं कीं लुगायां नै  
म्हारी झूलणी कुर्सियां माथै बैठाय 'र राजी-राजी  
वानै देखतौ रैवूं हूं अर वानै कैवूं;  
मैं अँडौ आदमी नीं हूं जिण माथै विस्वास कर सकौ।



सिंझ्या रा म्हें म्हारै कनै पुरसां नै भेळा करूं हूं।  
म्हां सगळ्ळा अेक-दूजा नै 'श्रीमान्' कैय 'र बतळावां हां।  
वै म्हारी मेज माथै पग पसारनै बैठै अर कैवै :  
जल्दी इज सब ठीक हुय जावैला। पण कद, म्हें औ नीं पूछूं।  
सवार री भूरी उरमा में देवदार उदासी सूं हिलण लागै अर  
पंखेरू नै वांरा टाबर रोवण लाग जावै, उण बगत म्हें  
नगर में म्हारो गिलास खतम करूं हूं अर सिगार  
फेंक 'र चिंतित मुदरा में सोवण नै जाऊं परो हूं।


यां नगरां सूं जिको गुजरै है, बो इज बाकी रैवैला— यानी हवा  
लोग घर में प्रसन्न रैयनै ई उणनै खाली कर जावै है  
म्हानै पतौ है के म्हां भूमिका मात्र हां अर म्हाणै पछै  
अठै जिकी वस्तु आवैला— वा उल्लेखजोग नीं होवैला।

आगामी धराकम्प में म्हनै आसा है के  
खारास रै कारण म्हें म्हारी सिगरेट नीं फेंकूंला—  
म्हें, बरतोल्त ब्रैख्त, काळा जंगळां सूं घणा समै पैली  
मां रै पेट में रैवतां थकां इज, कोलतार रा नगरां में  
फेंकीजियो।

ॐॐ

(लहर, विश्व कवितांक)





जलम : 6 जनवरी 1878  
निधन : 22 जुलाई 1967

## ●अमरीकन

### कार्ल सैण्डबर्ग

---

## अर युद्ध नुंवौ व्है या पुराणौ

आस्टरलीज व्है या वाटरलू  
लासां रौ ऊंचा सू ऊंचौ ढिग व्है—  
दफनाय दो, अर म्हनै म्हारौ काम करण दौ !  
म्हें घास हूं, म्हें सगळ्ळां नै ढक लेवूंला ।

अर युद्ध रौ छोटौ मैदान व्है या मोटौ  
अर युद्ध नुंवौ व्है या पुराणौ  
ढेर ऊंचा सू ऊंचौ व्है, बस म्हनै मौकौ मिळ जावै  
दो बरस, दस बरस— अर पछै उठी सू  
निकळण वाळी बस रा मुसाफिर  
पूछैला : आ किसी जगा है ?  
म्हां कठी सू होय 'र गुजर रैया हां ?  
औ घास रौ मैदान किस्यौ है ?

म्हें घास हूं  
सबनै ढक लेवूंला !

ॐ ॐ

(ज्ञानोदय, युद्ध विशेषांक)

● व्यूबन



जलम : 10 जुलाई 1902  
निधन : 16 जुलाई 1989

निकोलस गोलियन

---

## सिपाई री लास

वौ किण गोळी सूं मरियौ ?  
कुण जाणै  
वौ कटै जलम्यौ हो ?  
कैवै के 'जावेलावों' में !  
वौ मिळियौ कटै  
सडक माथै मरियोडौ पड्यौ हो  
साथियां देख्यौ, उठाय लियौ  
उणरी प्रेमिका आई है, उणनै चूम रैयी है ।  
उणरी मां आई है, रोय रैयी है  
अफसर आयौ है—  
'दफन करौ इणनै'  
र-ट-टर-रट  
वौ मस्योडौ सिपाई रैयौ है  
र-ट-टरट-टरट  
सिपाई रौ काई महत्त्व  
र-ट-टर-टर  
सिपायां री कोई कमी है !

ॐ ॐ



जलम : 12 मार्च 1922  
निधन : 21 अक्टूबर 1969

## ●बीटनीक

जैक केरुएक

---

### हाडका

म्हें

साफ-साफ

देख्यौ

इण

सगळै

व्यक्तित्व

दरसाव

रै हेटै छिप्योडौ हाड-पिंजर

मिनख

अर उणरै गरब रौ

सेवट

हाडकां रै सिवाय

काई बाकी रैवै है ?

रात्यूं-रात उणरै नाच रौ

पीपा भर-भर दारू रौ

जिकौ उणरै गळै नीचै उतरगौ

हा....ड....का

कब्र में वो

सडै है

कीड़ा उणनै

खावता रैवै है ।

ॐ ॐ

(लहर, विश्व कवितांक)

## ●ग्रीक

रेम्को कैम्फर्ट

---



जलम : 29 जुलाई 1929

## कवि

पूरी तोपखानौ  
अक हाथ में लियां  
प्रार्थनावां सूं गूंजतै  
काळै आकास रै नीचै  
म्हें ऊभौ हूं।

अक कोरी भीत माथै  
लोग लिख दियौ :  
'संकट'  
कोई आखर अधूरौ नीं हो।

वांनै म्हारी आंख्यां माथै विस्वास नीं रैयौ,  
म्हारी दीठ माथै भरोसौ छोड 'र  
वै म्हनै अक घर में भेज दियौ।

अक घर में जठै दांत सड़ रैया हा,  
जिकौ चारुंमेर पाणी सूं घिरियोड़ौ हो।  
पण जिणरौ धुंआकस चिड़ियां सूं भरियोड़ौ  
अक जूनौ टूटतौ धुंआकस  
जिकौ चिड़ियां सूं जीवतौ हो।

उणरी अक भीत सफेद ही  
पछै उठै अक नाव ई आयगी  
घर-घर जावण वास्तै।


वै म्हनै घरै भेज दियौ  
अक हाथ में  
आवाजां भरियौ थैलौ  
अर दूजा में  
पूरौ तोपखानौ देय र

ॐॐ

(हेमांगी, परंपरा विशेषांक / लहर, विश्व कवितांक)



● रूसी



बोरिस पास्तरनाक

जलम : 10 फरवरी 1890

निधन : 30 मई 1960

गांव


हाकौ थमगौ है। म्हें रंगमंच माथे आयगौ हूं।  
बारणै रै चोखटै माथे झुक 'र  
म्हें आधी दूर सू आवती आवाज में  
आ सुणण री कोसीस करूं हूं  
के जीवण में काई-काई बीतैला!

हजारूं ऑपेरा-झरणा सू रात रौ  
सरबग्रासी अंधारौ म्हारै ऊपर जम रैयौ है।  
दादोसा, बापू, जे औ व्हेय सकै तौ  
औ प्यालौ म्हारै सांम्ही सू हटाय लौ।

थारौ औ कठोर नाटक म्हनै रुचै है  
अर म्हें औ सांग करतौ ई राजी हूं।  
पण औ दूजौ नाटक सरू व्हेय रैयौ है  
इणमें म्हनै म्हारी इच्छा सू करण दौ।

द्रस्यां रौ क्रम तै होय चुकौ है  
अर मारग रौ अंत ई तैसुदा है।  
म्हें अकलौ हूं, सरबस डूबतौ जाय रैयौ है।  
जिंदगाणी में चालणौ, मैदान में चालणौ नीं है।

ॐॐ



जलम : 5 जून 1898  
निधन : 19 अगस्त 1936

## ● स्पेनिश

### गार्सिया लोर्का

---

#### आत्महत्या

(जिकी इण कारण हुई के थे थारी ज्यामिति नीं जाणता हा)

टाबर चेतौ खोय रैयौ हो ।  
सवार रा दस बज रैया हा ।  
उणरौ हियौ भरीजगौ हो  
टूटोड़ा पंख, कुमळीज्योड़ा फूलां सूं ।  
उणनै लखायौ के उणरै मूँडै में  
अेक इज सबद बाकी रैयौ है  
जद वौ दस्ताना उतार्या  
कंवळी राख उणरै हाथां सूं खिरी ।  
बारी मांय सूं अेक मीनार निजर आवती ही ।  
वौ खुद नै बारी अर मीनार महसूस कियौ ।  
वौ देख्यौ के सांम्ही राख्योड़ी घड़ी  
थिर निजर उणनै देख रैयी है ।  
रेसम रा धोळा ढिगला माथै  
वौ आपरी चुपचाप सूतोड़ी छांवळी देखी ।  
करडौ ज्यामितिक टाबर  
हथोड़ा सूं दरपण चूर-चूर कर न्हाख्यौ ।  
उणरै टूटतां इज छांवळी री अेक लांबी धारी  
झूठै विश्रामघर माथै हमलौ करण लागी ।

ॐॐ



## ● युगोस्लाव



जलम : 20 मई 1731  
निधन : 12 अगस्त 1789

इवान इवानवी

---

### रेलगाडी

कुण जाणै, कोई सिद अर क्यूं जावै है,  
कद, कीकर अर किण भेळौ वौ भिळ जावैला ?  
सगळा ग्रह नक्षत्र आकास रै मांय  
आपरी अणबीतणी जात्रा में  
बिना कटैई पूग्यां, बैवता रैवै है ।

अर सगळा आ जाणै के  
नगरां में स्टेसणां माथै अर गांवां में स्टोपेज माथै  
वांरी बाट उडीकणियौ भाग्य आंधौ इज है  
(क्यूं के किणी नै घणौ अर किणी नै थोड़ौ मिळै है) ।

सायद अेकाधा मिनट वास्तै  
गाडी कटैई रुकैला अर आ कोई नीं जाणै  
के चालै क्यूं नीं है ?  
पाछी चलियां पछै यात्री आपरै मुकाम रौ  
अंदाजौ लगाया करै है;  
पण उणीज टेसण मथै घणौ मोड़ौ व्है जाया करै है ।

ॐॐ



जलम : 31 मार्च 1914  
निधन : 19 अप्रैल 1998

## ●मेक्सिकन

### आक्टवियो पाज़

---

#### लपट


आकारां अर प्रकास रा भग्नावसेस थांरी गैरी छियां नै  
पूजै; प्यार, जिणरी पड़छांवळी कांनी  
म्हारी हांपती सांस दौड़ै, अेक जीवतौ रूख  
जिकौ आपरी अणसफीट कड़कड़ाट सूं पैली  
बीजळी री चमक री तरै ऊगै अर ऊठै है !  
अेक देवता प्यार-गैळीज्यौ अर काळौ  
नाम अर वाणीहीण जीवतौ देवता,  
गै 'री खामोसी नै गीत में बदळ देवै,  
म्हारी कमजोर जीभ नै चीख में बदळै,  
मंदगामी दुनियां नै लपट बणाय देवै,  
जिकौ आपरी अगनमयी छातियां में फेर अेक  
अणतिरपत, गुप्त अर भयंकर अगनी छिपायां है;

इण लपट सारू बुलबुल विलाप करै है,  
टाबर, आकार, बीज रा तूफान, आंसू अर रुदन  
रात नै पार करै, जठा ताई के वारा  
गुस्सै रा झागां रो प्रवाह धरती री सींव नीं तोड़ देवै;  
दुनियां इणी जीवती लपट सारू मरै है,  
प्रेम री महिमा में ऊंची ऊठनै, अर लुगायां  
धरती माथै न्हाटती फिरै है, पागल घोड़ा आपरै  
जळागारां री बजाय हिवडै री धड़कणां रा  
काळा झरणां सूं पाणी पीवणौ दाय करै है,  
जठा ताई के वै आपरी खतरनाक सांस सूं  
म्हारै सरीर रै थिर प्रकास-तरै नै ढक नीं लेवै;

इण तीखी लपट रै सारू रगत बैवै है,  
म्हारा कानां में अेक तूफान फाट पडै है,  
म्हारी दाइयोड़ी जबान गूंगी हुय जावै है  
अर हिडुदै री धडकणां रै पुळ माथै म्हां  
मौत अर सूनियाड़ रै पूगण ताई दौड़ता रैवां हां;

इण गुप्त लपट री खातर  
म्हें दुनिया बुझाय दी,  
जिकौ ई इणनै नीं चावै, उणनै म्हें नस्त करूं हूं,  
छांवळ्यां रै बिचाळै म्हें इणनै ओळख लेवूं हूं  
अर इणरा रगत में सदाई रै वास्तै डूब जावूं हूं।

ॐॐ





जलम : 7 अप्रैल 1889  
निधन : 10 जनवरी 1959

## ●चिलीयन

गैब्रेला मिस्ट्राल

### बुण रयी हूं अेक सरीर

अबै म्हैं सड़कां माथे नीं जा सकूं  
म्हारी कमर मोटी हुयगी है,  
आंख्यां नीचै गैरा काळा खाडा बणग्या है  
आं सगळां नै निरख 'र म्हनै लाज आवै  
पण फूलां सूं भस्चोड़ी अेक डोलची लाओ  
अर म्हारै कनै, साव म्हारै कनै उणनै धरौ ।  
धीमै-धीमै बाजा माथे कोई मीठी धुन सुणाओ ।  
उणरै सारू, फगत उणरै सारू  
म्हैं समदर में डूबणी चावूं,  
म्हैं म्हारी देही नै गुलाब सूं सजावूं  
अर उणनै सूवतां सुणावूं अमर गीत  
कुंजां में बैठ 'र घंटां म्हैं संचूं हूं सूरज रौ ताप  
के म्हारै में फळां रै रस सरीसौ  
इमरत (मधु) घुळ जावै ।  
चीड़ रा वनां सूं आवती हवा  
म्हारै मुख नै हेमळ बणाय जावै,  
उजास अर वायरौ म्हारै रगत नै जाडौ अर  
सुद्ध कर दै  
उणनै निरमळ बणावण सारू म्हैं अबै नीं तौ  
घिन करूंला अर नीं गपसप । फगत प्रेम,  
क्युं के इण सांयत में, इण इकांत में म्हैं

बुण रयी हूं अेक सरीर  
तूंतड़ा सू बणी अेक अद्भुत देही,  
अेक चे'रौ, आंख्यां  
अर हिवड़ौ निपाप।

ॐॐ

(हेमांगी, परंपरा विशेषांक / ज्ञानोदय)  
हिंदी अनुवाद : स्नेहमयी चौधरी

## हरेक चीज सारू म्हनै माफ कर दौ!

उण सारू, फगत उण सारू  
जिकौ घास में अटक्योड़ी जळ-बूंद री भांत  
अळसाय 'र  
सूवण इज वाळौ है, म्हनै चोट मत पुगावौ  
म्हनै काम करण सारू मत कैवौ।  
हरेक चीज सारू म्हनै माफ कर दौ,  
भलाई वा मेज सजाणै रै तरीकै माथै म्हारी  
झूझळट हुवै या हाकै रै प्रति म्हारी नफरत  
म्हनै पैली उणनै ओढाय 'र सुवावण दौ  
पछै थे म्हनै बताईजौ घर री मुस्कलां,  
चिंतावां अर काम,  
म्हारै माथा माथै, छाती माथै जठैई थे म्हनै  
भींटौ हो, वौ है  
अर वौ टस्कण लागैला  
जे थे म्हनै चोट पुगावोला।

ॐॐ



जलम : 7 नवंबर 1901  
निधन : 9 नवंबर 1964

## ● ब्राजीली

सेसीलिया मिरले

---

### ओळख

आ म्हारी जिंदगाणी है :  
ऊजळी रेत  
बैवती बणगटां सूं आंक्वोडी  
पून नै समरपित....

आ म्हारी वाणी है :  
खाली घोंघौ  
ध्वनि री प्रतिध्वनि  
आपरै इज रुदन सूं पूरण....

आ म्हारी पीड़ है :  
टूट्योडी सीपी  
आपरै दुख रा छिण पार करती....

आ म्हारी परंपरा है :  
अकलौ समदर  
जिणरै अक कांनी हो हेत  
दूजी कांनी है भुलाव ।

ॐॐ

( हेमांगी, परंपरा विशेषांक / ज्ञानोदय 6/66 )  
हिंदी अनुवाद : महेन्द्र कुलश्रेष्ठ

## ●ब्राजीली



जलम : 26 जुलाई 1895

निधन : 14 जनवरी 1974

## कैसियानो रिकार्डो

---

### दूजौ जीवन

म्हनै इणरै पछे  
किणी दूजै जीवन री आस नी है ।  
जे औ जीवन भूंडौ है  
तौ म्हें इणमें जिका-जिका दुख भोग्या हूं  
उणनै देख देवता राजीज हुवैला ।  
जे औ जीवन चोखौ है  
तौ उणनै दोवड़ावण सूं  
इणरौ सुख खतम नीं हुय जावैला ।

ॐॐ



जलम : 15 अक्टूबर 1934

निधन : 10 मई 1996

## ●डेनिस

### पॉल बॉरम

---

### भुलाव

की ई घटै कोनी सिवाय  
कोरा पत्ता झरै  
अर हुय जावै फालतू  
मतलब भेळा हुय जावै उणीज पोथी में  
वा पोथी  
जिणनै कोई नीं बांचै  
दरवाजां रै बारै  
आपरी नानकड़ी मौत मर रया है रूख ।

ॐॐ

( हेमांणी, परंपरा विशेषांक )



## ● हिन्देशियाई



जलम : 26 जुलाई 1922

निधन : 28 अप्रैल 1949

## चयरिल अनवर

---

### थोथप

बारै सांयत है। घिरचौ आवै है अकलपणौ  
रूख नीचै सूं ऊपर ताई सीधा, चुप ऊभा है।  
सांयत मूंडौ डेस्योड़ी है,  
इणनै चीरणवाळौ कोई कोनी। हरेक चीज  
बाट उडीकै, बाट उडीकै  
आपरै अकलपणै में इज  
जिकौ गैलौ कर देवै, तोड़ देवै  
जठा ताई के सगळौ-कीं टूट-फूट नीं जावै।  
किणनै परवा है  
के हवा जैरीली हुयगी है। सैतान हंस रैयौ है।  
अकलपणौ खतम को हुवै नीं। बाट उडीकूं हूं।

ॐॐ


## विदा

म्हें काच में देख रयौ हूं।  
चैरौ घावां सूं भस्योड़ौ है।  
किणरौ है औ ?  
म्हें अक पुकार सुण रैयौ हूं।  
—म्हारै हीयै में ?  
अथवा आ फगत हवा री चीस है ?  
बीचली रात में फेर  
औ गीत पसरतौ जावै है  
आह.... !!  
हरेक चीज जमती जावै है,  
करड़ी हुवती जावै,  
म्हें कीं नीं जाण सकूं।  
विदा.... !!

ॐॐ



## ● मैक्सिकन



जलम : 21 सितंबर 1902

निधन : 5 नवंबर 1963

### लुई कारनूदा

---

## घणा पैली रौ बसंत

अबै इण सिंझ्या रै बैंगणी सूरज-आथमणै में  
जद फूलां में पड़ी ओस सूं मैग्नोलिया भींज्योड़ा है  
वां सड़कां सूं गुजरणौ, आभै में चांद नै  
बधतां निरखणौ, अेक जागतै सपन सरीसौ हुवैला....

पंखीड़ां रा टोळा आपरै विलाप सूं आभै नै  
पसार देवैला, फंवारै रौ जळ आपरी सुधता सूं  
धरती री गैरी आवाज नै ऊपर बिखरैला  
अर तद आभौ नै धरती अेकदम चुप हुय जावैला....

निजनता रै किणी खूणै में, अेकला आपरौ माथौ  
आपरै हाथां में लियां, प्रतिहिंसक प्रेम री गळाई  
थे औ सोच-सोचनै रोवता रैवोला के  
जिंदगाणी कित्ती फूटरी ही अर कित्ती फालतू.... ।

ॐॐ

(हेमांगी, परंपरा विशेषांक)

अपरंच (अक्टूबर-दिसम्बर 2015) ● 35



जलम : 7 जून 1927  
निधन : 13 दिसंबर 1997

●कामनवेल्थ  
(ब्रिटिश गायगा)

मार्टिन कार्टर

---

## अगनी पुसप! थूं पाछौ आव

पंखीड़ा री गैरमौजूदगी में,  
अेक सदाबहार रूंख रै लारै  
मेह भींज्या सूरजाथमण रै साथै  
अेक संपूरण आकास आथम रैयौ है।  
मरुथळ में डूबतै ओळूं रै समदर री भांत  
जळ रा बडा-बडा होदिया सड़क माथै बणग्या है  
मेहुडै नै जीतणै री सूरज री नादान कोसिस  
बेकार सिद्ध हुयगी है।  
इण वास्तै हे अगनी पुसप!  
पून री पांखां माथै बैठ 'र  
थूं पाछौ आव!  
वौ जिणनै थे माणक कैवौ,  
मौत है।  
अर समदर रै सूख्यां पछै  
तळ री बालुका में मौजूद है  
उजास रा प्राण किणी दूजी जगै रैवै  
बिरखा अर किणी रूंख रै नैड़ा,  
जद औ दोन्यूं आपसरी में अेक हुवै।

औ फूटण वाळी पैली कूपळ !  
अर खिरतोड़ा छैला फळ !  
जद पकड़णै रै पैली इज थूं  
पून नै दिरीजगौ है  
आभौ फगत इण सारू फूल्यौ  
के मिनख सरू कर दियौ बधणौ;  
जळ रा किनारां माथै, जठै भाटा पडै  
अर डूब जावै,  
देखी सूरतां नै आत्मावां में बदळतां  
मतलब, अक घोंघौ सबद में बदळयौ ।  
अगनी पुसप ! थूं पाछौ परौ आव, पाछौ  
नू री हथेळ्यां माथै बैठनै ।

ॐ ॐ

(ज्ञानोदय 2/67)

हिंदी अनुवाद : परेश





जलम : 1945  
निधन : 1991

●कामनवेल्थ  
(वेल्स)

पॉल इवान्स

---

### धोळी सिलावां री घाटी

जद वा आपरी पिंडल्यां नै  
अेक दूजी रै माथे धरै  
मांस रा दोय पीळा चंदरमा उदै हुवै  
उणरी हरी जुराबां रै ऊपर ।  
पछै वा कुरसी सूं ऊठै  
अर वै पीळा चंदरमा  
काळा जळ में डूब जावै  
म्हें दरूजै ताई उणरौ लारौ करूं ।

धोळी सिलावां री घाटी  
अर उण माथे रपटती चांदणी,  
यानी के चांदी रै झरणै में  
अेक माछळी ।

अबै वा म्हारी मीट नै  
अेक डोरै सू बांधनै  
आपरा सुगोळ स्तनां रै च्यारूं कानी  
पळेट लेवै  
अर यूं  
अनेकूं जिनावरां रै बिचाळै घिर जावै ।

यां धोळी सिलावां रै बीच  
काळा घोड़ा अर गेंडा चरण लागै ।  
झरणै री चादर में  
म्हें उणनै पळेट लूं  
अर वौ पाणी म्हारै में समाय जावै ।

म्हें पाणी हूं,  
म्हें अटै पैली ई आयौ हो ।  
उणरी हरी जुराबां रै ऊपर ।

ॐॐ

(ज्ञानोदय, 2/67)



चित्राम  
अर  
कवि-समै री  
जाणकारी  
नीं मिल सकी

●कामनवेल्थ  
(केन्या)

जे. एच. चेपलीन

---

उपद्रववाळी क्षेत्र

वै लोग म्हारी झूपड़ी बाळ दी है।  
अजाण्या कोनी हा वै लोग,  
अर नीं पुलिस रा सिपाई  
वै सरकार रा भेज्योड़ा पाड़ोसी हा।  
क्यूं नीं कैवूं म्हैं वानै मित्र ?  
वै म्हांरा मित्र कियां कोनी ?  
अेक इज नाळा माथै दोनूं गांव पाणी भरै  
म्हे वारी मौत माथै सोग मनावं  
वै म्हांरा ब्यावां री जीमणवार में भेळा हुवै।  
पछै वै म्हारी झूपड़ी क्यूं बाळ दी ?  
पूरौ छपरौ लाय पकड़ली है  
पड़तोड़ी छत री बल्लियां चाय रा सगळा कप तोड़ दिया।

मेजां अर कुरस्यां बळगी है  
अेक कामळ में दबक्योड़ो  
म्हैं बारै बैठौ हूं  
अर म्हारी झूपड़ी बळ रैयी है।  
ॐॐ

(ज्ञानोदय 2/67)



● रूसी



येवजेनी येवतुरोंको

जलम : 18 जुलाई 1932

ईसकौ

म्हने ईसकौ हे  
अर औ भेद  
म्हें छिपायो कोनी ।  
म्हने ठा है—  
कटैई रैवै अेक टाबर  
जिणसूं म्हने ईसको है—  
क्यूं के बो झगड़ाखोर है  
म्हें नीं हो कदैई  
इतौ सैज, हिम्मती ।  
म्हने ईसकौ है  
उणरी हंसी माथै—  
म्हें नीं हंस्यौ यूं टाबरपणै में  
बो चींथरां में राजी हुयोड़ौ घूमै ।  
म्हें रईसी में पळ्यौ  
जिकौ नीं बांच सक्यौ म्हें  
पोथ्यां में—  
वौ उणनै जरूर बांचैला  
इणमें ई वौ म्हारै सूं बधगौ ।  
वौ हुवैला सांचौ अर साफ दिल  
चोखापै रै सारू भूंडापै नै

कदैई माफ नीं करैला  
अर जठै म्हारी कलम  
अटकै—  
“फालतू है....।”  
वौ कैवैला—  
“फालतू कठै....।”  
अर कलम उठावैला  
सुळझावैला  
नीं हुयौ तौ काट देवैला  
अर म्हैं  
नीं सुळझावूला, नीं काटूला।  
वो चावैला तौ अेक वार  
म्हैं लाड ( ? ) करूला  
अर बारंबार  
ईसकै नै छिपाऊंला  
मुळकूला  
अर जाणूला, जाणै कीं नीं जाणूं  
सीधौ हूं।

“कुण गलती नीं करै  
किणसूं चूक नीं हुवै....”  
खुद नै समझाऊं  
बारंबार दोवड़ाऊं—  
“हरेक रौ आपरौ भाग है।”  
पण भूल नीं सकूं  
कठैई है अेक टाबर  
जरूर प्राप्ती करैला वत्ती  
म्हारै सूं वत्ती।  
ॐॐ

( हेमांणी-परंपरा विशेषांक / ज्ञानोदय 1/69 )  
हिंदी अनुवाद : हेमचंद्र पांडेय

● रूसी



अलेक्सेई सुर्कोव

जलम : 18 जुलाई 1932

## इतिहास

छितिज ताई विसाळ समतळ भोम,  
आथम्योडै सूरज री लाली में अगनी रौ उजास  
नींद लेवतौ चित्तौड़ ऊभौ है हरियल ढळांस रै कांठै  
मेवाड़ रै बीतोडै गौरव रौ रक्षक ।

पारवाणां, भीतां सूं फूटतौ विलाप,  
विजै-स्तंभ चित्तौड़ रौ, कदळी सूं घिर्योडौ—  
ऊंचै मस्तक नै थिर कर  
अणंत सूं बातचीत में लीन ।  
मिलन-बेळ में इतिहास दोवड़ावै  
कथा दुस्मण रै कपट री, नकल री,  
चिंघाड़ गजां री  
हिणहिणाट तुरंगां री  
गूजण लागै कानां में ।


जीवै है टूटा-पड़्योड़ा मकानां में मिरतु अर नास—  
जिका घट्या है राजपूताणा में ।  
पून री हिलोर सूं बाजण लागै  
घंटियां जैन मिंदरां री ।

पड़योड़ा मकानां नै ढकती धूड़,  
अलोपित घाटी री हरियाळी में ।  
बूढो राजपूत शिव रा चरणां में  
नासकाहीण ईसर री वंदना में लीन  
मीट जमाय निरखै  
तकदीर काई कैवै....  
सुणौ बा'सा! अटै इज है थारा बेटा,  
अर साथै है जवान भारत !

ॐॐ

(हेमांगी-परंपरा विशेषांक / ज्ञानोदय 1/69)

हिंदी अनुवाद : हेमचंद्र पांडेय



## ●अरबी



जलम : 7 अगस्त 1165

निधन : 16 नवंबर 1240

## इब्न-अल-अरबी

---

### अरदास

रात रौ काळौ पड़दौ पड़गौ  
इसी बगत में वै आपरी यात्रा सरू करी ।  
म्हें अरदास करी—  
“औ प्रेमी पागल है, मतवाळौ है,  
अपमानित है ।

दया कर !  
लालसु इच्छावां इणनै अणूतौ दुखी करै ।  
जठीनै ई इणरा निबळा पग बधै  
उठी सूं तीखा बाणां री बिरखा हुवण लागै.... ।

वै मुळक बिखेर दी  
अर भळकगी बीजळी  
फाटगौ काळौ पड़दौ ।  
कुण फाड़्यौ ?  
मुळक अथवा बीजळी ?  
म्हें नीं जाण सक्यौ ।  
वांरा स्वर हा—

“म्हें उणरै मन-मिंदर रौ वासी हूं।  
वौ हर पल म्हारा दरसण करै है।  
पूरौ कोनी काई इतौ ?  
पछै थांरी अरदास किसी ? क्यूं ?

ॐॐ

(नवनीत 6/68)

हिंदी अनुवाद : संतकुमार टंडन 'रसिक'



## ●हंगेरियन



जलम : 5 मई 1909  
निधन : 9 नवंबर 1944

मिकलोस रादनोती

---

### कविता रै अनुकूल घर

घिरै है धुंधळको, तिरै है दुस्टी तारां सूं घिस्चोड़ौ  
घेरौ बळंत रौ, ऊठ्योड़ी झूपड़ी—  
सगळा रा सगळा लुकण सारू इण बेळा  
अंधारै में  
होळै-होळै सगळां नै चीरनै कैदी रौ सपनौ  
उलांघै है असभ्य भीत नै.... जे तौ ई  
भूल नीं रयौ वौ  
घणा आघा-आघा ताई फैल्योड़ा तार नै।

औ म्हारी प्रियतमा !  
बेलगाम सपना इज  
म्हानै वौ चैन दै सकै  
जिकौ टूटोड़ा पांख अर चूथ्योड़ी देह नै  
कर देवै पाछी आजाद; ढीली  
कर देवै सांकळां अर डेरां में लोग  
तैयारी करै  
आपरै घरबार री—

अंधार-घोर  
 गळियां में भागै है, खर्राटा भरतोड़ा  
 सर्बिया रा सिखरां सू पाछा आयोड़ा  
 टूटोड़ी देही अर मूंड्योड़ा माथा  
 बंदी—  
 सगळा रा सगळा दौड़ै है  
 घोर अंधकार में  
 आघी मायड़भोम मांय  
 ऊठै भुजावां हरेक बारणै में ।  
 सगळां रा नैनकिया सपनां में बावां उचायां  
 ऊभा है घर ।  
 साचाणी साबत है काई  
 आपणौ नगर ?  
 काई हाल ताई पड़्यौ नीं बम ?  
 म्हे वानै कैय'र आया हा—  
 थानै देवणौ है उत्तर ।  
 म्हारै जीवणै पासी जिका टसकै है  
 म्हारै डावै पासी जिका  
 घरै जावणी चावै है—  
 उणानै काई कैवूं ? कैय दूं  
 घरै जावै ?  
 काई हाल ही अखंड है  
 घर म्हारी कविता रै  
 अनुकूळ ?

मूंन, अंदाजै सू लिखूं हूं अेक कविता रै तळै  
 दूजी री ओळी :  
 जीवूं हूं घिस्चोड़ौ खुद रा इज दुख मांय  
 लिखूं सिरकतौ, हकलावतौ, मिनमिनाय'र  
 ज्यूं कागद माथै मारग बणावतौ कीड़ौ ।  
 खोसीजगी है मसालां अर पोथ्यां;  
 दुस्मण रा संतरी खोस नै लेयगा सैंग,



चिट्ठी ई बंद, कोरौ कोहरौ, फगत  
धुंध ढकी झूपड़ी।

पोल अर फ्रेंच, यहूदी अर ऊपरी बकबक करणिया इटालियन,  
बागी सर्ब—सगळां रै जीवण में,  
अठै आं परबतां रै मांय,  
बच्चोड़ी रैयगी है बस जूंआं अर अफवावां  
फूटग्या है गोडां सगळां रा  
टूटगी है सगळां री बावां—  
सगळा फगत 'अेक जूण' जीवै है  
बाट उडीकै है—  
आवती व्हे स्यात् खुसखबरी, आवता व्हे  
स्यात् संदेसा  
सुंदरियां रा,  
स्वाधीन लोगां रा!  
बाट उडीकै है कोहरै में छिप्योड़ै अंत री  
बाट उडीक रया है  
लोग चमत्कार री।  
काठ रा पाट्यां री सेज है; म्हैं अेक  
पींजरा में बंद पसु, जोखां लोही पीवै है।  
म्हैं सुण्यौ हो अंधारै में माख्यां  
नीं हुया करै— म्हारै अंधारै में है  
हमलावर माख्यां।  
होवै है सिंझ्या अर कैदी रौ अेक  
दिन फेर बीत जावै है। छोटी है  
जिंदगाणी। सूतौ है डेरौ। चांद री  
खिल्योड़ी है कळावां प्रदेस माथै— घेरा रा  
तार औस्चूं भी चमकै है—  
डेरा रै मून में पगध्वनि रै साथै  
साफ-साफ दीसै है  
काळी भींत माथै  
संतरी री छांवळी।

ओ म्हारी प्रियतमा ! काई तू जाणै है—  
सगळा ई सूता है, सपना  
छोडगा है म्हानै,  
छिण भर सारू नींद टूटै है  
अर चांदणी में चैरौ  
चमकै है

पण दूजै पल पाछौ  
नींद भर्यौ अंधारौ !  
फगत म्हैं जागूं हूं  
मूंडा में स्वाद है, थारा चुंबनां रौ नीं  
बुझ्योड़ी सिगरेट रौ  
म्हैं जाणूं हूं— नींद  
म्हारौ भाग्य नीं है  
म्हारौ भाग्य थूं है  
म्हैं मरूंला नीं थारै सूं न्यारौ  
थारै बिना भूलूं हूं  
जीवण रौ ढंग ।

ॐॐ

## पिक्कर पोस्टकार्ड

बुल्गारिया सूं जबरदस्त जंगळी  
बंदूकां री गोळियां आवै—  
सिखरां सूं भचीड़ा खाय, भटकनै, पितळनै  
गायब हुय जावै—  
घिर जावै मिनख, डांगर, बैगन अर विचार  
मारग हिणहिणाय र  
लारै सिरक जावै  
आपरा अयांळ उडावतौ  
न्हाट जावै आकास !


सगळौ तितर-बितर हुय रयौ है ।  
अैड़ा बगत में थूं! म्हारै मांय बठै इज रैय जा  
जठै ही, हिल मत  
म्हारै मांयली गैराइयां में  
मून रै अर सदा पळक  
ज्यूं सरबनास माथै अचरीज्यौ कोई  
फरिस्तौ अथवा सिङ्घोडै रूख में  
कंदरा बणावतौ कोई कीड़ौ ।  
नौ कोस आघा बळ रैया है  
झूपड़ां अर घर  
अर अठै खेतां री मेड़ माथै अचरज करता  
करसा धुंऔ उडावता बैठा है चुपचाप !  
बाजै तळाव रै जळ माथै  
गुवाळण छोरी रै पगां री छाप  
सरणाटौ तोड़ती भेड़ां जळ-झुक्योड़ी  
पीवै है मेघ ।  
बैवै बळदां रै मूडै सू रगत-भिळी लाळां  
फालौ हुयग्यौ खून सू  
मिनख रौ पेशाब;  
पीप-भर्यै असभ्य टोळै सू घिस्चोड़ौ  
ऊभौ है  
गुलाब !

म्हें उणरै पछै हो ! गरदन माथै गोळी  
अर उणरौ सरीर गुड़ग्यौ  
अेक नुच्योड़ी माळा रै दाणै सरीसौ  
'थूं ई मास्यौ जावैला यू' म्हें  
खुद नै कयौ, 'सूय जा चुपचाप !  
अबै फगत धीरज बदळ सकै  
मौत नै  
धूड़ में 'डियर स्प्रिंग नोख

ऑफ़' अवाजां आतां, आतां, आतां  
आयी नैड़ी  
रगत घुळ्योड़ै कादौ सूखगौ  
म्हारा कानां में !

ॐॐ

(हेमांगी, परंपरा विशेषांक / ज्ञानोदय 4/66)  
हिंदी अनुवाद : श्रीकांत वर्मा



## ●पेरू ( स्पेनिश )



जलम : 16 मार्च 1892  
निधन : 15 अप्रैल 1938

सेजार वेलेजो

---

## तीन कवितावां

### अेक

अेक मिनख है  
बैठ 'र खाज खिणै  
अर आपरी कांख सूं  
अेक जूं काढ 'र मार देवै  
काई इण बगत 'मन फांटणी' माथै  
बात करण रौ कोई अरथ हुय सकै ?

दूजोडौ मिनख म्हारा सीना माथै  
मुक्कौ मार दियौ  
काई म्हैं किणी डाक्टर कनै जाय 'र  
'सुकरात' माथै तरक करूं ?

अेक लंगडौ मिनख  
अेक नैना टाबर नै स्यारौ दियौ  
इण पछै ई  
'आंद्रे ब्रेटन' नै पढणौ जरूरी है काई ?

अेक मजूर डागळै सूं पड़ जावै  
अर लोगां रै कलेवा रै वगत सूं पैली  
मर जावै  
काई औ वगत किणी नुंवै छंद अथवा राग रै  
संधान रौ है ?  
अेक अपंग आदमी  
कांधै माथै पग धरनै सूवै  
अबै ई म्हैं किणी सूं  
'पिकासो' बाबत बात करूंला काई ?  
(हेमांगी, परंपरा विसेसांक)

दो

फगत म्हैं इज अेक इस्यौ मिनख हूं  
जिकौ सगळौ-कीं लारै छोड 'र  
कटैई आघौ जाय रयौ हूं

आघौ इण बेंच सूं  
म्हारा अंतस रा पड़दां सूं  
साधारण व्यवस्था सूं  
म्हारी रोजीनां री जिंदगाणी सूं  
टूटोड़ी नेम प्लेट सूं  
फकत म्हैं  
दूजौ कोई नीं  
अेकलौ म्हैं इज सगळां सूं आघौ  
जाय रयौ हूं।

म्हारी खुद री मौत ई  
म्हारै सूं न्यारी हुय रयी है  
अठा ताई कै  
म्हारा बिछावणा ई 'जैरामजी री' कैय रैया है।

म्हारौ 'म्हें' ई अकेलौ अर आजाद  
घूमण सारू रवानै हुयगौ है  
अर प्रेतां सूं मुगती पायली है ।

अके-अके करनै  
म्हें सगळी चीजां सूं 'विड्ढा' कर सकूं हूं  
क्यूं कै अ सगळी चीजां  
लारै छूट जावैला ।

जद म्हें आ साबित करणी चावूंला  
के "जिण वगत कतल हुय रयो हो  
म्हें उटै नीं हो ।"  
म्हारा जूता, जूता रा छेकला, कादा-कीच  
अठा ताई के म्हारी ऊजळी  
इस्त्री कस्योड़ी कमीज रा चमकता  
बटणां ताई लागोड़ौ कादौ  
इण बात नै पुखा करैला  
के कतल म्हें इज कियौ हूं ।

### तीन

म्हें पेरिस में मरूंला  
घणघोर बिरखा रै बिचाळै  
वौ दिन म्हारी याद में  
अबार सूं इज तै हुयगौ है  
म्हें पेरिस में मरूंला  
इण बात नै  
कीकर नकारी जा सकै ।  
गुरुवार नै  
क्यूं के आज गुरुवार नै  
म्हारी कवितावां इत्ती गद्यात्मक हुयगी है  
अर म्हारा हाडकां में इत्तो दरद हुय रयौ है

जेड़ौ पैली कदैई नीं हुयौ  
नीं म्हें पैली कदैई  
इतौ आघौ घूमण नै गयौ  
नीं पाछौ आय 'र आज सूं पैली  
म्हें खुद नै  
इतौ अकलौ मैसूस्यौ ।  
सेजार वेलेजो मरगौ है  
सगळा जणा मारौ उणनै  
अर वौ पडुत्तर में  
कीं नीं कैवैला  
आ वौ इज जाणै है  
के उणनै कितौ सताइज्यौ गयौ है ।

दूखता हाडका  
अर औ गुरुवार साखी है ।  
औ अकलपणौ  
बिरखा  
अर औ लांबी सड़कां  
इण बात री प्रमाण ।

ॐॐ

### इण अंक रौ मुखौळ

इण अंक रौ मुखौळ खुद पारस जी रे हाथ सूं बणायोड़ौ अक चित्राम है ।  
1965 में 'जाणकारी' रे प्रकासन सूं पैलां वै 'चौमासी' नांव सूं अक पत्रिका  
सहयोग प्रकासन, उदयपुर सूं काढणी चावता । औ चित्राम वै खुद उण  
पत्रिका रे मुखौळ सारू बणायो । कवर रे आखिरी पेज माथे इण अंक री  
विगत भी पारस जी री लेखनी मांय दिरीजी है । आ पत्रिका सांमी नीं आ  
सकी, पण औ मुखौळ पत्रिका रे उण कंवळै सपनै नै समरपित ।



●जर्मन



जलम : 1 फरवरी 1874  
निधन : 15 जुलाई 1926

ह्यूगो वान हाफ़मान्स्थल

---

निजू भासा

ऊग्याई है भासा थांरा होठां माथै  
साथै-साथै, ऊग्याई थांरा हाथां में अक सांकळ  
खींचो ! आखै जगत नै उणसूं आपरै कांनी खींचो  
नींतर थे खुद परबस खींच लिया जावोला !  
ॐॐ



जलम : 30 अक्टूबर 1885  
निधन : 1 नवंबर 1972

## ●अमरीकन

### अेजरा पाउंड

---

### समापन रा बोल

ओ म्हारा गीतडुलां  
इत्ती गैराई अर जिग्यासा सूं  
क्यू देखौ हो थे  
लोगां रा चैरां में  
वां में थानै आपरा बीतोड़ा मिळ जावैला काई ?  
(हेमांणी-परंपरा विशेषांक)

ॐ ॐ





जलम : 17 सितंबर 1882

निधन : 4 मार्च 1963

## ●अमरीकन

विलियम कार्लोस विलियम

---

### जीवणकाल

अेक मुड़ियौ-मुचियौ बडौ सारौ  
बिदामी कागद  
लंगै-ठंगै मिनख जितौ  
अर मिनख बरोबर घेराव वाळौ  
गुड़क रयौ हो  
हवा रै साथै  
उल्टीजतौ-पल्टीजतौ बारंबार  
जद आगै सड़क माथै  
के अेक मोटर सर्रू करती  
गई परी उणनै  
किचरती थकी  
जमीं माथै ! अर सागैसाग  
मिनख ज्यूं वौ  
पाछौ रुभौ व्हेग्यौ  
गुड़तौ-पड़तौ  
हवा साथै आगै बधतौ सागैसाग  
पैली ज्यूं।

ॐॐ

## ●अमरीकन



जलम : 29 मई 1892  
निधन : 25 अक्टूबर 1938

## अैल्फ्राजिना स्टार्नी

---

### बडेरं री पीड़

थे बतायौ— “म्हारा बापू री आंख में  
कदै आंसू नी आवता।”

थे बतायौ— “म्हारा दादोसा री आंख में  
कदैई आंसू नी आया।”

“म्हारी जात रा बणावणिया—म्हारा बडेरा

वै कदैई रोया कोनी : वै फौलाद रा हा!”

इतौ कैवतां-कैवतां थारी आंख्यां सूं आंसूडौ ढळकगौ

अर म्हारै होठां माथे टपकगौ— इतौ तीखौ हळहळ

इत्ता नैनकड़ा प्याला में म्हें कदैई नीं चाख्यौ हो

म्हें निबळा नारी, परबस नारी

जिकी जुगां री संच्योड़ी पीड़ नै

समझगी उणनै पीय 'र

म्हारी आतमा उणनै नीं कर रयी बरदास

उण पीड़ रै बोझ सूं तिलमिलाय उठी है।

ॐॐ



जलम : 7 दिसंबर 1909  
निधन : 23 जुलाई 1942

## ●बलगेरियन

निकोला वाप्सरोव

---

### इतिहास रै नांव


म्हे गुमनाम रचनाकार हां  
थे म्हांरो जिकर करोला  
खुद रै किणी पानै माथै, म्हांरौ ई नांव लिखोला ?  
कांदौ अर रोटी सूंघ 'र म्हां इण खेत नै  
जोतता रैया ।  
अर जिंदगाणी रै नांव माथै फटकार देता रैया  
खैर मनावौ के म्हां थानै केई खबरां देवता रैया  
थानै इणरी तिरस ही, म्हां खुद रौ रगत बैवावता रैया  
आवणिया कवियां री कलम विकास रा गीत लिखैला  
पण  
यातनावां री लंबी कथा अणलिखी रैय जावैला  
म्हांरी जिंदगाणी रौ कीं अरथ नीं है काई ?  
अेक जै 'र री खारास है— बस  
औस्यूं म्हांनै कीं नीं कैवणौ  
कांटां री अेक बाड़ ही, जिणरी छींयां झूलती रैयी  
अर म्हांरी मा  
म्हांनै जलम देय 'र पीड़ में घुळती रैयी  
पतझड़ में म्हां माखियां ज्यूं मरग्या  
मायडियां रै विलाप नै फगत जंगळी पत्ता इज सुण सक्या  
जिकौ ई बाकी बचग्यौ

वौ पसेवै सूं रगदाबगद हौ  
म्हानै बळदां ज्युं जोत लियौ गयौ  
बडा लोग बोल्या— “औ इज अरथावू जीवण है।”  
पण म्हारौ दोस औ इज है  
के म्हां इण दरसण माथै थूक दियौ  
इण दुख री पीड़ री कीमत म्हां नीं मांगां  
म्हानै बदळै में  
किणी मुआवजै, प्रसिद्धि री जरूत कोनीं  
नीं ई म्हां कैलेण्डर री तस्वीर बणणी चावां  
बस  
जिका म्हारै पछै आवै वानै इत्तौ इज कैईजौ—  
अेक जिंदगाणी, अेक कल्पना, अेक मूरत म्हां घड़ता रैया  
अर उजास खातर अंधारै सूं लड़ता रैया।

ॐॐ

(पहल 14/5)

हिंदी अनुवाद : राजीव शुक्ल



## ● कागद

### ✍ गोरधनसिंह शेखावत, सीकर ( साहित्यकार )

आपूँ पित्ताजी रै सुरगवास री खबर सुण 'र म्हनै घणौ दुख हुयौ । पारस जी म्हारै घणा नैड़ा हा । 'अपरंच' रै पैला अंक मांय म्हारी रचना छपी, उण बगत म्हें पिलानी पढतौ । पछै तो पारस जी सूं लगातार सम्पर्क रैयौ । 'राजस्थानी अेक' पत्रिका मांय पारस जी भी म्हारै साथै हा । वारी सोच अर सिरजणा राजस्थानी साहित्य सारू नुंवी अर गंभीर ही । अबार ताई भी वारा फोन बराबर आवता । आज भी म्हारै हियै मांय वारी याद ताजा है । म्हें भगवान सूं प्रार्थना करूं कै वै वारी दिवंगत आत्मा नै सांति अर आपूँ परिवार नै इण दुख नै संभाळण री खिमता देवै ।

### ✍ भरत ओळा, नोहर ( साहित्यकार )

प्रिय गौतम, काल थारै एस.एम.एस. सूं औ दुखदाई समाचार मिल्यौ । थानै हिम्मत बधावण सारू म्हारै कनै सबद नीं है । पारस जी रौ इयां जावणौ चबका मारै पण पारस जी हमेस आपां रै बिचाळै रैवैला ज्यूं पैली हा । पारस जी हमेस म्हारौ बेटै दाई लाड राखता, भोळावण देवता रैवता, "भरत थूं इयां कर.... भरत थनै इयां करणौ चाईजै...." वै सौ टंच प्रगतिशील रचनाकार हा । जावता-जावता ई वां आपरी प्रगतिशीलता बणायां राखी । आप वारै विचारां रौ मान राख्यौ अर वारी विरासत नै संभाळी, आ घणी थ्यावस अर हरख री बात है । पारस जी राजस्थानी भासा रा साचा सपूत हा अर राजस्थानी भासा नै मान्यता दिरावणी ईज वानै साची सिरधांजळी व्हेला ।

### ✍ रेखानंद बरोड़, बुकनसर छोटा ( किसान नेता )

दुःखद समाचार पोथी मांय बांच्यौ । घणौ जीव दोरौ हुयौ । म्हारी मायड़ भासा मांय लिखणै-पढणै री हूंस वारी ईज देन है । अबै आपनै वारी सारी जिम्मेवारी संभाळ'र मायड़ भासा री सेवा करणी है । राजस्थानी रा साचा जनवादी साहित्यकार नै म्हारौ लाल सलाम ।

### ✍ गजेसिंह राजपुरोहित, अध्यक्ष राजस्थानी विभाग ( जेएनवीयू, जोधपुर )

आपूँ पित्ताजी रै सुरगवास रौ दुखद समाचार मिल्यौ । पारस जी राजस्थानी रा लूंठा साहित्यकार अर विद्वान हा, वारी कमी हमेसा रैवैला । म्हें अर वि. वि. रौ राजस्थानी विभाग वानै निवण करां । ईश्वर सूं अरदास है वारी आतमा नै सांति अर आपनै इण दुख नै संभाळण री खिमता देवै । जै राजस्थानी ।